

Èkwò, Pòlù deru nù Ndu Éfesọsu

¹ Ọwaa bú ẹkwò-òzì, mubẹ Pòlù ede. Mu bú onye Nchileke fọtáru; mee mu tẹ mu búru onye ishi-òzì Kuráýisutu Jisọsu.

Mu ede iya anù ndu kẹ Nchileke, bu lẹ Éfesọsu; mbù ndu kweru kẹ Kuráýisutu Jisọsu; ẹphe l'iya atugbabe búru nanù.

² Tẹ Nchileke, bú Nna; mẹ Nnajiufu, bú Jisọsu Kuráýisutu meeru unu eze-iphe-ọma; mekwaa-phu t'ẹhu dù unu agu.

Ọnu-ọma, shi l'ẹka Kuráýisutu

³ T'ajaja búru kẹ Nchileke; mbù Nchileke ono, bú iya bú Nna kẹ Nnajiufu ayi Jisọsu Kuráýisutu ono. Ọ bú l'ẹka Kuráýisutu ono bẹ ọnu-ọma, dù l'iche iche ọphu shi l'imigwe shi rube ayi ẹka.

⁴ Tẹmanu Nchileke emee mgboko b'ọ vuhawa ọzọ shi l'atugbabe, ayi lẹ Kuráýisutu tugbaberu fọta ayi t'ayi búru ndu nk'iya; k'ọphu ayi a-bù ndu, dù nsọ; búru ndu, ẹ-te nwedu ẹkworo l'ifu iya.

⁵ Ọ bú okfu l'ọ yeru ayi obu; meru iphe ọ chíhawaru iya achìchì dobe: lẹ ya e-shi l'ẹka Jisọsu Kuráýisutu; nata ayi yeru onwiya t'ayi búru unwu iya. Ọ bú ẹge ono b'ọ dùhawa Nchileke mma l'obu; bukwaruphu ẹge ọ tọberu tẹ ya mee ya ndono; ⁶ k'ọphu aa-ja iya ajaja kẹ ọdugburuku eze-iphe-ọma nk'iya ono, dù biribiri, ọ nùru ayi kẹ mmakanù ono; mbù

ayi be ndu ayi le Nwa iya ono, o yeru obu ono tugbaberu buru nanu.

⁷ O bu mee ono, Kuráyisutu lokaru l'okfu eka ayi ono b'o gude gbata ayi. Yo bukwaru iya phu bu le Nchileke aguaru ayi nvu l'iphe du eji, ayi meru. Eze-iphe-oma ono aburu iphe-oma, kfube oswa ha nshinu b'o meru ayi ono; ⁸ mbu eze-iphe-oma ophu o kfube jaa eka ogbodo ajaja meeru ayi.

⁹ O mekwaruphu t'ayi maru iphe; nweru okpobe egomunggo; k'ophu iphe oome e-doje ayi enya; bu iya bu l'o meru; ayi abya amaru iphe ono, shi buru iphe o domiru edomi, bu iphe o kwakobehawaru t'o shi l'eka Kuráyisutu medzua. ¹⁰ Iphe ono, Nchileke tuberu le ya e-me teke gbaru nu ono be bu l'oo-chigbabekota iphe bu iphe, o keru ekeke l'o ha; bu iya bu iphemiphe obule, no l'igwe; me ophu no l'ali. Yo bya ewota Kuráyisutu mee ishi iya.

¹¹ O bu Kuráyisutu be ayi l'iya tugbaberu. Yo buru iya meru t'ayi yiru l'iphe ono, o kweru ndu nk'iya ukwa iya ono. Oo ya kparu iphe Nchileke emekotaje iphemiphe obule ege o tubuhawaru iya; mee ya ege bu uche-obu iya. O bu Nchileke ono vuhawa uzo fohawawa ayi. ¹² Oo ya bu t'ayibedua, bu ndu ophu vuhawa uzo leta enya Kuráyisutu gudeje umere ayi l'o ha koshi ege biribiri Nchileke habe nshinu.

¹³ Ege ono b'o dukwaphu unubedua, bu ndu e-ta budu ndu Ju. Le teke unu nuluruphu okpobe ozi-oma ono, e ziru unu le Nchileke dzofutawaru unu ono be unu kwetaru ke Kuráyisutu; Nchileke egude Ume-du-Nso, o

kweru ukwa iya mee unu iphe-ohubama; gude koshi l'oo ya nwe unu. ¹⁴ O bu Ume-du-Nso ono ekoshi l'ayi a-natakwaa iphe ono, Nchileke kweru ndu nk'iya ukwa iya ono, bu iphe ayi a-nata teke Nchileke a-gbafuta ndu nk'iya; gbafutagekpo ephe ohuma ohuma. T'ayi jaa odu-biribiri Nchileke ajaja!

Polu ekfu anu Nchileke

¹⁵ O bu iphe ono be meru iphe mu ta habua okele Nchileke ekele mkpurumkpuru; shi-takpooru teke ono, mu nuru l'unu woru onwunu ye Nnajiufu ayi, bu Jisosu l'eka ono; me le ke obu, unu yekotaru ndu ke Nchileke l'ephe ha. ¹⁶ Mu ekeleje Nchileke ekele; ekfu anu iya l'okfu eka unu tekenteke: ¹⁷ te Nchileke ono, bu Nchileke ke Nnajiufu ayi Jisosu Kurayisutu; bu iya bu Nna ono, bu o-ka-le-biribiri ono nu unu Ume-du-Nso, bu iya e-me t'unu maru mmamiphe; yo koshikwaphu unu Nchileke; k'ophu unu a-maru iya. ¹⁸ Mu ekfujekwaru iya phu t'o mee obu unu t'o phu iphoro nk'iya; k'ophu unu a-maru iphe ono, o kuru unu t'unu le enya iya ono; makwaruphu ege eze iphe ophu o kweru ndu nk'iya ukwa iya habe l'uru; ¹⁹ me ege ike nk'iya ono, e-te nwedu etu ono emebe ire l'ehu ayibe ndu kweru ke Kurayisutu. Ike ono, eme ire, bu ayi l'ehu ono be bukwa iphe lanu yele eze ike iya ono, ²⁰ o gude mee Kurayisutu t'o shi l'onwu teta nodu ndu; woru iya dobe l'eka-utara iya; bu iya bu okwa, a kwaberu iya ugvu l'imigwe. ²¹ O bu Kurayisutu bu ishi l'eke ono. O kakota iphe, bu o-chi-oha imigwe l'ephe ha; me ndu

ekfu iphe emenu l'ephe ha l'imigwe; mę iphe, bu ndu, bu ephe; bę ike nọ l'ęka l'imigwe; męwaru nnajiọha imigwe l'ephe ha. O kakwaphu iphe bu ndu bu ọnyibe nshinu; mbu ọnyibe k'eliphe-a; mę k'eliphe ọphu abya nu. ²² Nchileke meru tę Kuráýisutu tuko iphemiphe ọbule dzopyabe l'ọkpa; woru yebe Kuráýisutu ono nu chọchi t'ọ buru chọchi ishi l'iphemiphe ọbule. ²³ O kwa chọchi bu ugwehu Kuráýisutu. Yọ buru lę chọchi bę iphe kę Kuráýisutu dzuru edzudzu. Yọ bukwanuru lę Kuráýisutu bę iphemiphe ọbule kę Nchileke dzuru edzudzu.

2

Oshi l'anwuhu; bata lę ndzu

¹ O nweru teke unu shi buru ndu nwuhuru anwuhu; okfu l'unu te shidu anuru Nchileke okfu; unu eshi emephe iphe du ęji. ² Teke ono; bę unu shi etso ęka ndiphe. Unu shi anọduje eme iphe epherephere kfuru, bu iya bu onye ishi ọphu achi l'ephekerephe; mbu ọgvu ono, emeje tę madzu kwefuru Nchileke ike ono. ³ Ayi l'ayi ha tukokwaa shi du l'ọ ephebedua. Ayi shi tsoru emephe ęjo iphe, shi ayi lę mee. Iphe ayi emeje abuleruphu iphe du ayi mma l'ęhu; mę iphe du ayi mma l'uche. Ayibedua shikwaa buru ndu oke ęhu-eghughu kę Nchileke dakfufutaje l'ọ bu ndu ọphunanu.

⁴ Obenu l'obu-imiko kę Nchileke kariru akari. O yeru ayi obu yegharu iya ayi ęka. ⁵ Ayi shi l'emeswe, ayi mesweru Nchileke buru ndu nwuhuru anwuhu. Obenu lę Nchileke męwaru; ayi lę Kuráýisutu atuko bya anọdu ndzu. Unu

nyatakwa l'ò bụ eze-iphe-oma kẹ Nchileke b'o gude dzọfuta unu. ⁶ Ayi lẹ Kuráýisutu Jisòsu tųgbaberu buru nanu; Nchileke emee t'ayi teta nọdu ndzu; k'ọphu ayi l'iya a-tuko achi l'imigwe. ⁷ Iphe kparu iphe o meru iya ege ono bụ t'o gude iya koshi oḡbo ophu nọ l'ifu eze-iphe-oma iya, nyiberu anyibe; koshikwaphu ege obu-oma iya, shi l'eka Kuráýisutu Jisòsu habe ayi nshinu l'ehu. ⁸ Ọ bụ eze-iphe-oma kẹ Nchileke b'o gude dzọta unu. Adzọta ono, a dzọtaru unu ono shi l'ekwekwe, unu kweru kẹ Kuráýisutu. Ẹ to nwekwa iphe odo, unu eyekwadu iya odo. Adzọta ono ta bụdu obunggo kẹ iphe unu seru akanya iya. Ọ bụlephu iphe-oma, Nchileke meru unu ewoma. ⁹ Ẹ to nwekwa iphe bụ iphe unu egude l'asa nsasa k'egbe iphe unu meru. ¹⁰ Ọ bụ Nchileke keru ayi. O shi l'eka Kuráýisutu Jisòsu kee ayi; k'ọphu ayi a-nọduje eje okpobe ozi, dụ mma ophu o kwakọbehawaru ayi t'ayi jeje.

Aabu nanu l'ime Kuráýisutu

¹¹ Ọo ya bụ; unube ndu ẹ-ta bụdu ndu Ju; unu nyatakwa iphe unu shi buru teke o hazu. Ndu Ju ekuje unu “ndu akpapyi;” l'eku onwephe “ndu, buru utsu” gude iya l'ekoshi l'ephe bụ ndu kẹ Nchileke. Ọle utsu, ephe buru bụlephu iphe madzu egudeje eka ebu l'eli ehu. ¹² Unu nyatakwa lẹ teke ono be unu te shidu nọdu Kuráýisutu l'eka. Unu shi buru ndu o hodo, ẹ-te tsodu lẹ ndu Ízurelu. Ọ bụ ndu Ízurelu ono; be Nchileke fọtaru t'ephe buru ndu nk'iya. Eka unu te shidu dụ l'iphe bụ ukwa ono, Nchileke kweshiru ndu nk'iya ono; to nwe iphe unu

shi ele ęnya iya lę mgboko-a. Unu ta ma onye Nchileke bụ. ¹³ Obenu lę nta-a bę unubę ndu ono, shi nọdu Nchileke ote-ęnya ono bę Nchileke shiwa l'atugbabe, unu lę Kuráýisutu tugbaberu bụru nanu; kurita unu ntse ntse; Kuráýisutu egude mee, ọ lọkaru l'oshi-osweru swafu iphe du eji, unu meshiru. ¹⁴ Kuráýisutu l'onwiya bę bụ ęhu-agu nk'ayi; yębedua, meru; ayibe ndu Ju; mę ndu ę-ta budu ndu Ju aburu nanu. Tọ du iya bụ; yo shi l'anwuhu, ọ nwuhuru; nwukpofu ndumashi ono, du l'ọ bụ upho-mkpuma ophu nonu; buru ohogu nọduru ayi l'unu ono. ¹⁵ Kuráýisutu meru tę ekemu ndu Ju; mę unwu nsọ; mę ome-l'ali, tso iya nu be erehe ire. Iphe Nchileke eme bụ k'ophu mba labu ono a-bya aburu ndu lanu k'ophungu; t'ęphe l'iya tugbabe buru nanu; t'o shi ęge ono mee tę nchi du ndo; ¹⁶ mę tę Kuráýisutu shikwaphu l'anwuhu ono, ọ nwuhuru l'oshi-osweru ono; chikpoo ndumashi ono; shikwaphu l'anwuhu kę oshi-osweru ono; mee mba labu ono t'ęphe buru nanu; k'ophu oo-dulata ęphe azu dukfuta Nchileke. ¹⁷ Ọo ya meru iphe Kuráýisutu byaru bya ezidzuru madzu kpamukpamu ozioma kę ęhu-agu ono; zia ya unubę ndu ę-ta budu ndu Ju, bụ iya bụ unubę ndu shi nọdu Nchileke ote-ęnya; zikwaa ya phu ndu Ju, bụ ndu ophu shi nọdu iya ntse ntse. ¹⁸ Ọ bụ l'ęka Kuráýisutu bę ayi l'ayi ha shi; mbu ayibe ndu Ju; mę ndu ę-ta budu ndu Ju bya aburu ndu aduje ike gude Ume-du-Nsọ lanu bya evudo Nna ono l'ifu.

¹⁹ Ọ bụ iya bụ l'unubę ndu ę-ta budu ndu Ju ta buhekwa ndu alala; unu ta buhe mbyamumba.

Nta-a bẹ unu bụwa ndu ẹphe ẹ ndibe Nchileke tuko bụru ndu a muru l'ekalanu; unu tukowa bụru ndu onu-ulo Nchileke. ²⁰ Nta-a bẹ Nchileke gudeekwa unubedua akpuli ulo iya ophu ndu ishi-ozii; me ndu shi nkfuchiru Nchileke toru nto-l'ali iya. Yo buri Kurayisutu Jisusu l'onwiya bu itso, gude ulo ono. ²¹ O bu Kurayisutu ono bu onye gudekota ulo ono l'o ha; gudeshia ya ike; buri iya emeje t'o vua evuvu buri eze-ulo, e doberu Nnajiufu nsọ. ²² Unube ndu ophu unu l'iya tugbaberu buri nanu be okpulekwaphu unu le ndu ophunanu l'o bu ulo; t'unu buri eze-ulo eke, Ume Nchileke a-bya eburu eburu.

3

Ozi, Polu ejeru ndu ohodo

¹ O bu iphe ono meru iphe mu anoduje ekfu anu Nchileke mube Polu, bu onye noru Kurayisutu Jisusu le mkporo l'ishi unube ndu e-ta budu ndu Ju. ² O doru mu enya l'unu anuhawa le Nchileke shiwa l'ome eze-iphe-oma iya ono; ye mu ozi-wa l'eka te mu jee; t'o duru unu le mma. ³ Nchileke woru iphe o shi domia edomi togboru mu eba te mu maru iya. Mu tsotahaakwaru onu l'okfu ono l'odungu; obu le mu gburu iya mkpirikpi. ⁴ Unu -gulephu iphe mu dehawaru l'ekwo be unu a-marua ege o dotaberu mu enya mbu iphe ke Kurayisutu ono, Nchileke shi domia edomi ono. ⁵ Teke ndiche be Nchileke te shikwa emeje te ndiphe maru iphe nk'iya ono, o shi domia edomi ono. Obenu le nta-a be Nchileke shiwa l'eka Ume-du-Nso iya togbo

iya eba; k'ophu ndu o fotaruru dobe iche; mbu ndu ishi-ozii iya; me ndu ekfuchiru iya nu a-maru iphe ono. ⁶ Iphe ono, o shi domia edomi ono bu l'o bu ndu e-ta budu ndu Ju be epe le ndu Ju gba mgba l'onu-oma ophu shi l'eka Nchileke. Epe tuko dzekfua l'ehu onye lanu; tuko yiwaru l'ukwa iphe Nchileke shi l'eka Kuráyisutu kwee. Yo buru ozi-oma ono meru t'ayi maru iya nta-a.

⁷ O bu ozi-oma ono be mu ese akanya iya. Yo buru Nchileke fotaruru mu te mu jeje ozi-oma ono. Onanu aburu eze-iphe-oma, Nchileke meru mu ewoma. Yo shi ege ono koshi mu ege ike iya retaberu mu ire l'ehu. ⁸ L'iphe bu ndu enya epe laru le ndu ke Nchileke be bu mu b'o katsua alala. Yo bulerua mbedua be Nchileke gbe meeru eze-iphe-oma ke te mu buru onye e-tsoru ohamoha; ekfukashiru mba, e-ta budu ndu Ju k'eze-iphe-oma ono, shi l'eka Kuráyisutu, paaru nshinu; k'ophu bu l'oriri madzu te erudu l'ege o ha. ⁹ O bu mu b'o ziru te mu mee te ndiphe kpamukpamu pu ege Nchileke eshije eme iphe o tuberu. Nchileke, bu iya tuko iphemiphe obule kee chihawaru iphe ono achichi dobe b'o kederu mgboko. Obenu l'o shiru keshinu teke ono domita iya edomi. ¹⁰ Yo buru nta-a be Nchileke shi l'eka chochi mee te ndu bu o-chi-oha imigwe; me ndu ekfu iphe emenu, no l'imigwe maru ege mmamiphe ke Nchileke gbakotabeberu. ¹¹ Nchileke tuko iphemiphe obule ono mekota ege o rihawaru iya ru l'ede-nwede l'o bu ege ono be ya e-me iya. Yo buru onye o shi l'eka mee ya bu Nnajiufu ayi, bu Kuráyisutu Jisusu. ¹² O bu Jisusu ono

bụ onye ayi kweru nk'iya; ayi l'iya atugbabe buru nanu; k'ophu ote ta anohedu ayi l'obu; ayi enwewaru onu-okfu; ayi ta atsohe enya obya ovudo Nchileke l'ifu. ¹³ Oo ya be mu arọ unu; byiko; t'unu be egudekwa ke iphe-ehuka-wa, mu eje l'okfu ehu unu-wa; t'obu jihu unu oyi le ke Kuráyisutu. O bukotakwa iphe e-wotaru unu ugvu.

Obu, Kuráyisutu yeru ayi

¹⁴ O bu iphe ono meru iphe mu ebyishije ikpere l'alị ekfu anu Nchileke, bu Nna; ¹⁵ mbu onye bu l'eka iya be iphe bu ikfu l'ikfu, no l'imigwe; me l'eliphe shi gbube ishi ndzu ephe. ¹⁶ Mu anoduje ekfu anu Nchileke t'o shi l'odu-biribiri iya, nyiberu anyibe; shi l'eka ke Ume-du-Nso iya nu unu ike; k'ophu obu e-shihu unu ike. ¹⁷ Mu ekfujekwaphu anu Nchileke te Kuráyisutu kwata ufu; buru eburu l'ime obu unu; keshinu unu kwetawaru nk'iya. Mu ekfujekwaphu anu Nchileke te n-yemobu unu mee unu t'unu shihu ike; lopyabe unu ege ogvu-oshi aloyabeje oshi, gvuru egvuru t'o shihu ike; me te n-yemobu unu ono mekwaaphu unu t'unu shihu ike ege nto-l'alị ulo emeje ulo t'o shihu ike. ¹⁸ Ege unu le ndu ke Nchileke l'ephe ha a-duje ike t'o doo unu enya ohuma mbu ege adzota, Kuráyisutu dzotaru unu hatabe usa-usa; hatabe ogologo; hatabe l'eli; me ege o duta-be ogvu; ¹⁹ me t'unu makwaruphu le n-yemobu ke Kuráyisutu hanuka nshinu. A makwaru-a l'e to dudu teke o nweru onye a-makotaru iya nu; k'ophu aatukowaru ege Nchileke gbaru phukota l'ehu unu.

²⁰ T'ajaja buru ke Nchileke ono, emeje meghata ege ayi aduje ike su t'o meeru ayi; mbu mee mee ophu ayi ta ri-vudu l'egomunggo; ²¹ t'e shi l'eka chochi kwabe iya ugvu; shikwaphu l'eka Kuráyisutu Jisqsu tuje iya epha gbururu jeye le tutu youy! Ono kwa ege o du.

4

Ndu ke Kuráyisutu bu nanu

¹ O bu iphe ono kparu iphe mbedua, bu onye no le mkporo; okfu le mu ejeru Nnajiufu ozi arọ unu t'unube ndu ke Nchileke ndu ndu; meje iphe Nchileke tberu teke ono, o fotarun unu ono. ² Unu wozitaje onwunu ali; unu emeje agu; buru ndu anwagbuje iphe l'obu. Unu nwagbuje iphe ibe unu meru unu l'obu; shi ege ono koshi ege unu yeberu ibe unu obu. ³ Unu keshijee ehu t'unu ba aha oburu nanu ono, Ume ke Nchileke meru t'unu buru ono. Te Nchileke mee te nchi du unu ndo; t'unu l'ibe unu buru nanu ege unu bu iya. ⁴ Keshinu ayi tuko nata Ume-du-Nso lanu be ayi tukokwaphu buru ugwehu lanu. O bukwapu ege ono b'o bu iphe lanu be Nchileke kuru ayi t'ayi le enya iya. ⁵ O bu Nnajiufu lanu be ayi nweru; buru ekwekwe lanu be ayi kweru; bukwaruphu baputizimu lanu be nonu. ⁶ O bu Nchileke lanu no; onye bu iya bu Nna ayi l'ayi ha; bya aburu iya no-ngokotaru; gudekota onyemonye obule eje ozi iya; bya eburu l'ime ayi l'ayi ha.

⁷ Onyemonye obule l'ime ayi be Nchileke mewaru eze-iphe-oma. Yo buru ege Kuráyisutu

gude kee ya bu ege a natagbaaru iya. ⁸ O dua l'ọ bu iphe e deru l'ekwo okfu Nchileke; su:

“Le teke o gbeshiru lashia l'imigwe
b'o dutaru igweligwe ndu
ọ lutaru l'ogu kpuaru onwiya.

O nuru madzu iphe ewoma.”*

⁹ ?Bu ngunu b'ọ bu mbu “l'o gbeshiru lashia l'imigwe.” Iphe ọ bu bu l'o vuru uzo shiodu l'igwe nyizita al; bu iya bu l'ime ime al ke nggodo owaa. ¹⁰ Oo ya bu l'oo onye lanu ono, nyizitaru nu ono bukwa iya phu be nyihuru nu; tuko imigwe l'ọ ha nyighaa; k'ophu ọ tukoru ekemeke obule ghakota. ¹¹ O bu iya bu onye “nuru madzu iphe ewoma”. Iphe ewoma iya ono bu l'ọ gutaru madzu t'ephe haru buru ndu ishi-ozu; guta ndu odo t'ephe buru ndu nkfuchiru Nchileke; guta ndu odo t'ephe buru ndu e-jeje ozi ozi-oma; guta ndu odo t'ephe buru ndu a-noduje eleta chochi enya; bya agutakwaphu ndu odo t'ephe buru ndu a-noduje ezi okfu Nchileke. ¹² Iphe meru iphe o meru iya ege ono bu t'o shi ephe l'eka; mee ndu ke Nchileke k'ophu ephe a-du ike jeeru Kuráyisutu ozi-wa; me k'ophu ugwehu Kuráyisutu ono, bu iya bu chochi e-tsefuta etsefuta. ¹³ Yo buru ege ono b'oo-du jeye teke ayi a-tuko buru ndu tugbaberu buru nanu; okfu l'ayi tuko kweta ke Nwatibe Nchileke; me ke l'ayi tukokwaphu majia ya enya. O bu iphe e-me t'ayi bukwaruhu ndu e-tsefuta; buru mkpurophu madzu lanu, dzuru oke ndono. ¹⁴ Iphe, bu iphe meru te Kuráyisutu dzua

* 4:8 4:8 Egvu 68:18.

oke; e-mekwaphu t'ayi dzua oke; k'ophu ayi ta abuhedu unwegirima, bu ndu uphere-onu ndu ejo nzizi a-noduje atuphe nwa-nkata-eweji l'ọ bu ugbo be eyii-mini atunga atunga l'echi enyimu. Onye vughawaru ege ono be ndu ejo nzizi te eduphuhakwa; mbu ndu ejo nzizi, egudeje ererede me ugho eduphu ndu odo uzo. ¹⁵ Iphe ayibedua e-gbe meje bu t'ayi kfujee ire-lanu; yeru ibe ayi obu gude ege ono evu evuvu l'iphe kpamukpamu; evukfube Kuráyisutu; yebedua, bu iya bu ishi ayi. ¹⁶ Oo ya emeje t'ugwehu ono l'ọ ha dzekfutsua le nkwo iya le nkwo iya; buru nanu. Teke ono be ugwehu l'ophu a-tuko evu evuvu; shihu ike; keshinu iphe bu iphe e meru; yo nodu l'ehu tuko-wa emegbaa ege gbaru nu. O bu ege ono be oo-du l'ehu Kuráyisutu me ndu ke Nchileke -yeru ibe epe obu.

Ndu ophungu shi l'eka Kuráyisutu

¹⁷ Oo Nnajiufu be ziru mu te mu kfua ya kfushia ya ike; te ndu unu ba aduhakwa l'ọ bu ke ndu e-ta madu Nchileke; mbu ndu egomunggo swehuru; ¹⁸ oriri epe agbakota tsabalangu. Epe te enwekwa nke le ndu ono, Nchileke anuje ono. Iphe kparu iya nu aburu l'epe kpo-chiru nchi; to nwe iphe epe maru le ke Nchileke obu. ¹⁹ Iphere gvwaru epe l'ifu; epe ewowaru onwephe togboru umere, rehuru erehu; wata ome mkpakomkpako iphe odo, ruhuru aruhu; k'ophu epe ajitsua tototo ala l'oru uru-ali, dutsua iche l'iche.

²⁰ E to bukwa egbe iphe ono bu iphe unu mutaru l'eka Kuráyisutu. ²¹ Ophu doru enya

bụ l'unu nūwaru kẹ nk'iya; e zikwaaphu unu iphe, bụ ọkpobe okfu, nọ l'ẹhu Jisọsu ono; keshinu unu l'iya tūgbabewaru bụru nanu. ²² Ọo ya bụ t'unu haa akahụ umere ono, unu shi anọduje eme teke ono, unu te shidu bụru ndu kẹ Kuráýisutu ono. Ọ bụ akahụ umere ono bẹ ẹgu iya meru unu; unu ta ma l'ọ bụ onwunu bẹ unu aghọru ụgho; bụkwaru iya phụ emeje; unu alaa l'iyi. ²³ Tẹ Nchileke mee ọkpoma unu; mẹ uche unu t'ọ bụru k'ophungu. ²⁴ Unu yekwase umere ọphungu ono l'ọ bụ onye yeru uwe; bụ iya bụ umere ọphu Nchileke meru; yo yeru umere nk'iya. Egbe umere ono ekoshije onwiya l'ọkpuberu ndzụ, vudo nhamunha; bya adu Nchileke mma.

²⁵ Ọo ya bụ; unu haa ọdzu-phe ẹjo-ire. T'onyenonu kfujeru ibe iya ire-lanụ; okfu l'ayi bụkota ndu lanụ; likfuru l'ugwehu Kuráýisutu. ²⁶ Teke bụ l'ẹhu ghutaru unu eghughu; unu be ekwekwa t'ẹhu-eghughu ono mee t'unu mee iphe dụ ẹji. Unu be ekwekwa t'ẹhu ghua unu eghughu jeye t'enyanywu riba. ²⁷ Unu ba ahakwaru Sétanu ụzo l'ẹhu unu. ²⁸ T'onye ezi iphura haa ya ezizi; gude ẹka iya setaje iphe l'ụzo, vudo nhamunha; shi ẹge ono setaje iphe oo-gude yeru ndu ọdo, mkpa nọru ẹka. ²⁹ Unu be ekfujekwaru ibe unu ẹjo okfu. Ọ bụ-chikwaa okfu ọma bụ iphe e-shije unu l'ọnu; bụ iya bụ egbe okfu ọphu emeli madzụ emeli; l'akwọkwaphu ndu nuru iya nụ lẹ mkpa. ³⁰ Unu be emekwa Ume-dụ-Nsọ iphe ọo-dzurobe adzurobe. Ọ bụ Ume-dụ-Nsọ ono bẹ Nchileke gude mee unu iphe-ọhubama; l'ọo ya nwe unu. Ọo ya bụ iphe Nchileke gude

ekoshi unu lẹ mbọku ono, Nchileke a-gbafuta unu ono nọphu abya. ³¹ Unu tųkokpoo k'ọta ifu kọngukongu; obu-ọku; mẹ ẹhu-eghughu paru haa. Unu ahaa ọra-chije ibe unu nchị; haa okfubyishi ibe unu. Unu be edobejekwaru ibe unu iphe l'obu; m'o -ruhuru; ngunu mee. ³² Ọ bụchia t'unu mejeru ibe unu odoo; phujeru ẹphe imiko. Unu agujeeru ibe unu nvu; egbe iya ono, Nchileke shiwa l'ẹka Kuráýisutu gọaru unu ono.

5

Umere, gbaru ndu kẹ Kuráýisutu

¹ Ọo ya bụ; keshinu ọphu unu bụwa ẹgirima, Nchileke yeru obu; unu mụje umere iya t'unu dọ ẹge ọ dọ. ² Tẹ ndzụ unu l'ọ ha koshije l'unu yeru ibe unu obu ẹge ono, Kuráýisutu yeru ayi obu; swee ẹnya lẹ ndzụ iya l'okfu ẹhu ayi; woru onwiya chọaru Nchileke ẹja, dọ Nchileke mma ono.

³ Keshinu unu bụwa ndu kẹ Nchileke b'ẹ tọ gbahẹkwa t'unu ye ẹka l'uru-alị; mẹ l'iphe bụ ẹjo umere, rehuru erehu; m'ọ bụ l'ogvu ẹnya-kfụrukfuru. T'ẹ b'o nwekwa ẹjo iphe ono, unu e-jejekpo ophota l'ẹpha l'ẹke unu nọ. ⁴ T'ẹ b'o nwekwa teke unu e-kfujẹ okfu, rehuru erehu; m'ọ bụ kfujẹ tųkpotukpotukpo okfu; m'ọ -bụ t'unu tujẹ ẹjo ntụ-okfu. Iphe ono te nwekwa ọphu gbaru unu l'ememe. Iphe unu e-mejehia bụ t'unu gbe keleje Nchileke ekele. ⁵ Unu tųbe nvọ l'owaa: l'ẹ to nwekwa onye arụ uru-alị; m'ọ bụ onye eme umere, rehuru erehu; m'ọ bụ onye ẹnya-kfụrukfuru, byaru bya a-bahụ l'ẹke

Kuráýisutu mę Nchileke bụ eze; kę l'onye ęnya-kfurukfuru bę dukwaa ęji l'ọ bụ onye agwa nte.

⁶ Unu be ekwekwa t'o nweru onye e-gude mkpokoro okfu; dughua unu. Ọ kwa iphemiphe ọbule ono akpataję tę Nchileke zube ndu ę-ta anuduru iya okfu oke ęhu-eghughu iya. ⁷ Ọo ya bụ t'unu lę ndu dų ęge ono be emegbajekwa iphe lę phuu. ⁸ Unubędua shikwaa nọdugbaa l'ękpuru-ọchi. Obenu lę nta-a, unu lę Nnajiufu bya atugbabewa buru nanu-wa bę unu nọkwa l'iphoro ono. Ọo ya bụ t'unu meje umere, e-koshi l'unu nọ l'iphoro ono. ⁹ L'iphe iphoro akpataję bụ umere ọma; odobe-ęka-ndoo; mę ire-lanụ. ¹⁰ Unu kebe ęhu mụta ome iphe atso Nchileke ęna. ¹¹ Unu be etsokwa ndu ono; l'eme iphe ę-ta badu uru; mbụ iphe ndu nọ l'ọchi emeje. Unu gbe wofutaje iphe ęphe eme; tųaru ęphe jalangu l'ifu. ¹² Iphe ono, ęphe anọduje emeebe l'edomi ono bę dukpokwaa ęji; k'ọphu iphere iya te ekwekpodua nų t'e je iya ephota lę phuu. ¹³ Teke e wofutakotawaru iphe l'iphoro b'a phukotawaru ududu iphe ọbu; ¹⁴ kę l'iphe bụ iphe e wofutakpowaru iphoro bę buwa iphoro l'onwiya. Ọo ya meru iphe aasuję:

“Tehu; muru ęnya nggube edzu mgbenya.

Shi l'anwụhu, i nwụhuru teta; gbeshi;
tę Kuráýisutu buru iphoro;
chiaru ngu l'ọ bụ anwụ.”

¹⁵ Ọo ya bụ; t'unu kwakwaa ęnya l'egbe umere, unu a-nọduje eme nta-a. Unu meje l'ọ bụ ndu maru iphe; be mehe l'ọ bụ ndu ę-ta madu iphe.

¹⁶ Teke o nweru nwuzo, unu kpatajęru k'ome

iphe dū mma; unu ba ahajekwa iya t'ò laa l'iyi; l'iphe dū eji paakwaru apaa lẹ mgboko nta-a. ¹⁷ Unu ba abukwa ndu eswe. Unu sejee; maru iphe dū Nnajiufu mma t'unu mee.

¹⁸ Unu ba angujekwa mee; k'ophu ọo-tsu unu atsutsu. Lẹ mee emejekwa madzu; yọ zahaa onwiya. Ọ bụ iphe unu e-gbe mee bụ t'unu kwe t'ọ buru Ume-dụ-Nsọ e-jije unu ẹhu. ¹⁹ Unu gudeje Egvu-oma; egvu ekele; mę egvu odowaru, shitsua Ume-dụ-Nsọ l'ẹka gudeje kfulu ibe unu okfu, e-meje t'obu shihu ẹphe ike. Unu gujeru Nnajiufu egvu ekele; gujekwaru iya phụ Egvu-oma. Unu gudejekwaphu obu unu l'o ha keleje iya ekele. ²⁰ Unu gudeje ẹpha Nnajiufu ayi, bụ Jisọsu Kuráýisutu keleje Nchileke, bụ Nna ekele k'iphemiphe ọbule tekenteke.

Umere, gbaru nwoke yele nyee ya

²¹ Unu wozitaje onwunu alị l'ẹke ibe unu nọ; gude koshi l'unu kwabẹru Kuráýisutu ugvu.

²² Unubẹ unwanyi; unu wozitaje onwunu alị l'ẹke ndu bụ nji unu nọ; gude koshi l'unu wozitaru onwunu alị l'ẹke Nnajiufu, bụ Kuráýisutu nọ. ²³ Ishi iya bụ l'ọ kwa nwoke bụ ishi kẹ nyee ya; ẹge ono ọ bụ Kuráýisutu bụ ishi kẹ chọchi ono. Ọ bụ Kuráýisutu bụ Onye Ndzọta k'ugwehu iya ono; mbụ chọchi. ²⁴ Ọ bụ ẹge chọchi wozitaru onwiya alị l'ẹke Kuráýisutu nọ; bụ ẹge unwanyi e-wozitaje onwẹphe alị l'ẹke nji ẹphe nọ l'iphemiphe ọbule.

²⁵ Unubẹ unwoke; unu yeru nyee unu obu ẹge Kuráýisutu yeru chọchi obu; woru ndzụ iya nụ l'okfu ẹka chọchi. ²⁶ Iphe, meru iphe o meru

iya ẹge ono bu: o -gudetsua mini; me okfu-
 onu iya saghee chochi t'ọ du mma; yo gude iya
 mee ya t'ọ duru Nchileke iche; ²⁷ k'ọphu oo-
 kulataru onwiya chochi l'ọ bu nwanyi, eje ọlu
 nji; mbu nwanyi, ama mma; to nwe ẹkworo, no
 iya l'ehu; ehū ta du iya ẹlikfuta ẹlikfuta; m'ọ
 bu egbe iphe ọdo, du ẹge ono; mbu t'ọ buru
 onye duru Nchileke iche; t'o nwe ẹke uta no iya
 l'ehu le phuu. ²⁸ Ọ bu ẹge ono be unwoke e-
 yejeru nyee ẹphe obu ẹge ẹphe yeru onwẹphe.
 Nwoke, yeru nyee ya obu bu onwiya b'o yeru
 iya. ²⁹ Ẹ to nwekwa onye kpojeru onwiya ashi.
 Iphe o gbe emeje bu l'oonoduje anu onwiya nri;
 eleta onwiya ẹnya. Ọ bu ẹge ono be Kuráyisutu
 anoduje emeru chochi; ³⁰ ke l'ayi bugbaa iphe
 motagbaaru iya l'ehu. ³¹ Ishi iya aburu l'e deru
 iya l'ekwo okfu Nchileke; su: "Ọ bu iphe ono
 kparu iphe nwoke a-ha nna iya; haa nne iya;
 je yele nyee ya atugbabe; ẹphe ẹbo ono abya
 aburu onye lanu." ³² Iphe ono, Nchileke shi
 domia edomi ono, e deru l'ẹke-a ono bukwa
 ọkpobe katakpọ iphe. Iphe mu phuru l'ẹke ono
 bu l'ookfu ke Kuráyisutu yee chochi. ³³ Ẹge ono
 be ookfukwaruphu unu l'ehu l'ehu; bu iya bu
 le onyenonu yefutajeru nyee ya obu ẹge o yeru
 onwiya; nwanyi, nonu ekoshije le nji iya duru
 iya le nsọ.

6

*Umere, gbaru unwegirima;
 me ndu muru ẹphe*

¹ Unube ęirima; ọ bu iphe gbaru unu; mbu t'unu nujeru ndu muru unu okfu; l'ọ kwa uche-obu Nchileke t'unu meje iya ęe ono. ² “Kwabeje nna ngu; me nne ngu ugvu;” bu ekemu ọdungu, Nchileke kweru ukwa obunggo tukobe. Obunggo ọbu, Nchileke kweru ukwa iya ọbu bu: ³ “k'ọphu iphemiphe ọbule a-duru ngu le mma; nggu akakwaaphu nka le mgboko-a.”

⁴ Unube ndu bu nna; unu be emejekwa ęirima unu iphe, e-ghu ęphe eghughu. Unu gbe huje ęphe ahuhù l'uzo ke Kuráyisutu; kpo-zijeru ęphe uzo; shi ęe ono zufuta ęphe.

*Umere, gbaru ndu bu ohu;
me Nnajiufu ęphe*

⁵ Unube ndu, bu ohu; unu gude ọtsu-egvu; me ọkwabe-ugvu nujeru nnajiufu unu ke mgboko-a okfu. Unu wofutaje obu; mee iphe, ęphe ziru unu; l'ọ bu Kuráyisutu be unu emeru iya. ⁶ T'e b'ọ bulekwapu teke ęphe ele unu ęnya be unu e-jeje ozi; ęe ee-shi t'ęphe jaa unu ajaja. Iphe unu e-meje bu t'unu gudeje ọkpoma unu l'ọ ha; meje iphe no Nchileke l'uche, bu iya bu iphe gbaru ndu, bu ohu ke Kuráyisutu. ⁷ T'ehu tsojekwa unu ęna t'unu je ozi unu; l'ọ bu Nnajiufu, bu Jisosu be unu ejeru iya. ⁸ Unu nyatakwa le Nnajiufu e-bu onyenonu nggo iphe du mma, o meru: ?m'i bu ohu; ?m'i bu amadu.

⁹ Unube ndu, bu nnajiufu; unu mejekwaru ohu unu ọhuma ęe ono kwaphu. Unu ahaa ęphe ọnma-pheru ọnwu. Unu nyatakwa l'unu l'ohu unu bu Nnajiufu lanu ono, bu l'imigwe ono be

nwe unu. Yẹbedua te emekwa ele madzụ ẹnya l'ifu.

Ngwa-ọgu, Nchileke anuje

¹⁰ Iphe mu gude akpochi iya ishi bụ t'unu noshia ike l'atugbabe, unu lẹ Nnajiufu, bụ Jisosu Kuráiyisutu tugbaberu; k'ophu ike iya ono, nyiberu anyibẹ ono e-me unu t'unu shihu ike. ¹¹ Unu wotakota ngwa-ọgu ophu shi l'ẹka Nchileke kwaa onwunu; k'ophu unu a-dụkwanu ike vudoshia ike; lụa ejo ẹregede kẹ Obutuswe. ¹² Lẹ tọ bụkwa madzụ mmakanụ bẹ ayi l'ephe alụ. Ndu ayi l'ephe alụ bụkwa ndu ọ-chi-ọha imigwe; mẹ ndu ekfu iphe eme nụ l'imigwe; mẹ ndu imigwe, nwe mgboko, bụ k'ẹkpuru-ochi ọwaa; me ikpetuma ndu soja, nọkota l'imigwe. ¹³ Ọo ya bụ t'unu chilikota ngwa-ọgu, shi l'ẹka Nchileke nta-a; k'ophu bụ teke ejo ụboku ono byaleruphu; t'unu dụ ike vudo vudoshia ike; t'ọ mụaru unu l'iya. Teke unu l'iya lụkpooru iya jeye l'ishi; t'unu vudolee l'ẹke, unu vudo.

¹⁴ Ọo ya bụ t'unu rụkota ẹhu ọhuma. Unu woru ire-lanụ kee onwunu l'ọ bụ onye gude akpọ-buleti kebuta uwe iya l'ukfu. Unu eworu odobe-ẹka-ndoo kpua onwunu l'ọ bụ uwe-igwè ndu l'ẹje ọgu. ¹⁵ Unu gudeshia ozi-oma kẹ ẹhu-agu ono ike t'ọ bụru akpọkpa, unu yeru tẹ ẹturu ba lọ unu. ¹⁶ Unu gundefukwaaphu ekwekwe, unu kweru kẹ Jisosu t'ọ bụru iphe unu e-gbobeje gude l'ezeru onwunu; gude iya nashia akfụ ono, ejo onye ono, bụ Obutuswe agba unu ono; mbụ akfụ ono, enwu ọku, shi l'ẹka Sétanu ono. ¹⁷ Unu nata adzọta ophu Nchileke dzọtaru

unu t'ọ bụru okpu-ígwè, unu e-kpuru l'ishi. Unu anatakwapu okfu Nchileke t'ọ bụru ogu-mbeke, Ume Nchileke yeru unu l'ẹka. ¹⁸ L'iphemiphe ọbule ono bẹ unu a-nọduje ekfuru Nchileke t'o yeru unu ẹka. Unu kfujekpelekwaphu nụ Nchileke tekenteke ẹge Ume-dụ-Nsọ edu unu. Ọo ya bụ t'unu mụjeru ẹnya mkpụrumkpuru. Unu kfujekwapu nụ Nchileke l'okfu ẹka ndu nk'iya. ¹⁹ Unu kfujekwaruphu nụ Nchileke l'okfu ẹka mu: tẹ Nchileke ye mu okfu l'ọnu teke mu ghelijeru ọnu k'okfu okfu; tẹ mu ba atsuje egvu okfu katakpụ iphe ono, ozi-ọma meru t'ayi maru ono. ²⁰ Ọ bụ l'okfu ozi-ọma ono bẹ mu bụ onye Kuráýisutu yeru tẹ mu nọchia ẹnya iya; 'e gudekwaru lẹ nta-a bẹ mu nọ lẹ mkpọro. Ọo ya bụ iphe mu ekfu; sụ t'unu kfujẹ nụ Nchileke: tẹ mu kaa obu; saje ozi-ọma ono ẹge gbaru mu tẹ mu saa ya.

Ekele mkpọ-chi ishi iya

²¹ Mu mawaru lẹ ọo-dụ unu t'unu maru ẹge mu dụ; mẹ ẹge mu eme ala nta-a. Nwanna ayi Tíkikọsu, ayi yeru obu; mbụ onye e gude ire iya ẹka l'ozi kẹ Kuráýisutu; e-kfuwaruru unu iphemiphe ọbule; k'ọphu unu a-ma ẹge mu eme ala. ²² Ọ bụ iphe meru iphe mu ezi iya t'ọ byakfuta unu ndono; k'ọphu ọo-kọru unu ẹge ayi dụ; obu eshikwanua unu ike.

²³ Tẹ Nchileke, bụ Nna; mẹ Nnajiufu, bụ Jisọsu Kuráýisutu mee t'ẹhu dụ ndu nk'iya agu; mekwaaphu t'ẹphe yeru ibe ẹphe obu; mẹ t'ẹphe kweta nk'iya. ²⁴ Tẹ Nchileke meeru madzụ kpamukpamu eze-iphe-ọma; mbụ iphe bụ ndu

yeru Nnajiufu ayi, bu Jisosu Kuráýisutu obu;
yeru iya ẹya gbururu jeye.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb